

四庫全書

集部

欽定四庫全書

明詩綜卷十六

翰林院檢討朱彞尊編

劉仔肩

三首

仔肩字汝弼鄱陽人洪武初用薦應召至京

靜志居詩話汝弼一應鶴書旋集都人士詩為雅頌正音而以已作附之殆游大人以成名者是時許中麗仲孚則編光岳英華偶桓武孟則編乾坤清氣賴良善卿則編大雅集沈葵士傳則編明詩選雖擇焉不精然草昧之初干戈甫戢風雅未墜於地至今得存不可謂非羣賢揚

北之
力也

贈張時敬還荆南

隨牒適荆土倦游滯京畿謀生苦拙訥事與心恒違朋
儔一疎濶山川復閒之音問曠莫達何為遽來斯世故
有變遷歲月成推移顏藻減丹渥衣塵化為縑稍欣披
雲霧復覩聯珠璣意愜苦不早情深發彌遲夕語厭促
漏晨遊恐斜暉論舊已慨歎況乃重乖離春草滿南浦
時花匝郊圻乖人無為懽感物悲路岐昔別已三載重

來復何時幸茲書軌同遠邇無不宜逸足志四海羈禽
戀故枝言念屬繇翰聊以叙所思

春曉曲

紫絲複帳流蘓結雲母屏風疊香雪門前嬌柳乳鴉啼
暖漏丁丁曉將徹花枝入簾紅尚小蘭露著衣香不歇
江南行客歸未歸芳草春風滿城闕

望闕口號

閭闔排雲玉

一作寶

殿開千官鳴珮

一作鴛鴦

早朝回不知誰

獻升平

一作王褒

頌得奉君王萬壽杯

陳

謨

二首

謨字一德號心吾泰和人明初聘脩禮書辭歸

有海桑集

劉子高云先生鉅篇大軸流播郡邑幅巾野服翱翔山水之間門生兒子

扶携後先使人望而敬之狎而愛之羅子理云先生詩文出入古今變化不可測

詩話微君大德遺民雖應弓招未縻好爵楊東里梁不移皆其弟子洪武庚戌曾校文廣東則孫仲衍乃其所取士矣又嘗主奉新清節書院講席其沒也蘓平仲輓以詩云道德宗前代詩書啟後人胡光大詩云文章漢奐鼎聲價魯瑤興楊詩云純明程伯子灑落邵堯夫梁詩云立

志希漁洛研精績考亭諸公推許若是其論詩
云稱詩者曰寂寥乎短章春容乎大篇短章貴
清夏纏綿涵思深遠造其極者陶韋是也大篇
貴汪洋闊肆開闔變化不激不蕩起乎人者李
杜是也韓退之蘓子瞻二公雄渾傑特
非絢章繪句之比此詩之至也知言哉

游天慶觀登衆妙堂

堂有玄元像奇古而蘓公小
大二碑及居士泉皆廢蓋成

卒后
之

琳宮宅兒年褻汙衆妙門試窺擣衣砧上有看山文上
堂羅兒婦下堂飼雞豚塑像古且奇稽首玄元君端居
燕穆清誰使居人羣亦有居士泉澄源為之昏那無一

寸膠可洗千丈渾

聞道

聞道潼關下黃流似海深
由來天設險過者日傷心
漢殿芝房冷唐陵玉甃沉
不應有佳氣鬱鬱尚如今

金

信

三首

信字中孚金華人以茂才舉不就
隱居自怡人稱漫吟先生有春草軒集

詩話中孚為鐵厓入室弟子嘗序其詩云金華
金信從予游於松陵澤中談經斷史於古歌詩

尤工如古琴操趙璧辭荆卿篇博浪椎月支王
頭飲器歌其氣充其情激其辭鬱以諧吁信之
詩有法矣今鐵厓所稱諸篇皆不可得見惜也
阮元聲金華詩粹謂仲孚於明初召入中書省
進講經史以實錄考
之蓋至正戊戌年事

洞庭曲

浩蕩太湖水東西兩洞庭吹簫明月裏龍女坐來聽
湖上望蘓臺水與青天遠長風送飛帆忽到長洲縣

太陽嶺淨刹菴

林綠生晝寒蕭然水晶域今日復重来青苔見行迹雲

生身上衣月照松下石坐久聞疎鐘空山未眠夕

郊經 三首

經字仲誼仁和人元進士有玩齋稿

詩話仲誼元之舊臣沐景鵬編滄海遺珠以其詩歷卷蓋明初徙滇者也

春陪呂志學曾彥魯劉仲原同登虎丘賦呈居中

長老

虎丘山前新築城虎丘寺裏斷人行梵僧自識灰千劫
蜀魄時飄淚一聲漸少松杉圍窄堵無多桃李過清明

向來游事誇全盛曾對春風詠太平

詩話虎丘詩集一卷王高士賓所錄吾鄉項氏
萬卷樓藏書也中載仲誼是詩同時和者呂敏
志學云山上樓臺山下城朱旗夾道少人行曾
朴彥魯云閶閭冢上見新城無復行人載酒行
僧寧居中云公餘聯騎入山城老衲追陪得散
行人周南老正道有至正丁酉冬督役城虎丘
詩八首一云奉檄趨功城虎丘一云四疊新城
遠澗限一云百萬城春落杆齊虎丘築城吳人
亦鮮有知者予嘗泊
丹山後見遺址尚存

題映雪園

夜雪明書几寒風入絁袍如何燒鳳蠟只解醉羊羔

絡緯圖

牽牛風露滿籬根
淡月疎星夜未分
燈下有人挑錦字
機絲零亂不成文

郭文

一首

文字仲炳號舟屋滇中詩人

楊用修云滇中詩人永樂間稱平居

陳郭郭名文號舟屋其詩有唐風三子遠不及也其登碧難山太華寺一聯云湖勢欲浮雙塔去山形如擁五華來一時閣筆信佳句也但全篇未稱耳

詩話舟屋竹枝詞顧仲瑛編入玉山雅集則是詩元季已流播矣用修稱是永樂間人其集既

不可得無由臆決偶閱柯退東崗集附錄滇南
別意詩則平居陳郭四人之作皆存焉平名宣
武林人居名廣海昌人陳名謙吳人東崗跋云
郭居皆武士中賢者郭善詩文征南將軍都督
沐繼軒璘師之居精吏事總府碑掌簿書數十
年得官陳官鎮撫有詩名宣則松雨先生子也
黔府西塾薦升廣南府通判所云松雨先生者
知藤縣事顯字仲微考東崗引疾去滇在景泰
二年七月別意詩即是年之作郭於元時撰竹
枝八明八十四年未必尚存用修雖稱見其全
集竊疑竹枝非集中詩玉山
雅集所載當別是一人也

竹枝詞

金馬何曾半步行碧雞那解五更鳴
儂家夫婿久離別

恰似兩山空得名

呂

誠二首

誠字敬之崑山人

閏月二十四日陪館士秦文仲陸良貴奉省臣命
祭劉龍洲先生墓

黃鵠磯頭風雨秋中原一望使人愁
羣臣誰決和戎議
九廟猶銜誤國羞
慨慷魯連寧入海
淒涼王粲重登樓
荒崗四尺先生墓
再拜酌之雙玉舟

感興

靜室無塵少客過
新篁陰曳小坡陀
朝來始悟春歸盡
風裏楊花似雨多

鄭

昂

四首

昂字處抑溫州平陽人有密菴集

閏八月歸故山

負郭曾無二頃田
何由辦得買山錢
秋風八月又八月
客路一年還一年
鸞鳳俱垂赤霄翅
麒麟不受黃金鞭

功名富貴真細事只問平生不問天

棲遲

棲遲久慕王官谷飄泊仍依謝客巖貧賤誰能從趙孟
行藏我已卜巫咸冥鴻豈解投矰弋老馬惟思脫轡銜
却笑杜陵生計拙晚將身世託長鑱

感懷

王粲淒涼仍去國杜陵老大竟飄蓬荊州豈免依劉表
蜀道終須謁鄭公三禮賦成追昔日七哀歌罷起秋風

青青亦有江南草
鸚鵡洲邊恨不窮

小景

水驛山橋四五里
楓林茅屋兩三家
何人踏雪尋僧去
潮退春船閣暮沙

范再一首

再字續卿休寧人有緝齋耕隱橐

乙卯冬自陝回至中
年夜與牛車同行故題驛亭
我經中年道夜竝牛車
行何人問牛喘鞭撻勢伶仃更

罹輓下苦犢兒隨母鳴車夫為我言吾家懷慶城來此
數百里執役難具名流囚與軍裝日夜不少停黃昏伴
牛卧飯牛到天明漢月皎千里風霜淒十程牛死急應
官欲哭還吞聲白刃尚可蹈蒼天終無情吾家有老父
日暮還力耕無糧可充飢無衣可蔽形行人聞此言泣
下如雨傾我亦征塗間垂老重飄零何時息干戈時康
歌太平

沙可學

一首

可學永嘉人元進士行省掾

詩話楊廉夫有送沙可學序其畧云某官來總行省事求從事掾之賢能者首得一人焉曰沙可學氏又得一人焉曰高則誠氏又得一人焉曰葛元哲氏三人者用而浙稱治三人者天府登其賢書大廷榮其高等而拜進士出身賜任州理佐理之職者也

可學僅存詠懷詩蓋憶庚申君北狩而作首句指賈魯挑河言也

詠懷

疏鑿功成王氣衰
九重端拱尚無為
貪夫柄國忠良沒
巨敵臨郊社稷危
萬里朔雲沙漠漠
六宮禁御草離離

金輿玉輅無消息腸斷西風白鴈飛

游

莊

一首

莊字子敬

所聞有感

塵飛鹿走力難任
巡幸沙邊悔恨深
鳥篆未經銜軹道
龍文先自徙汾陰
空傳行在淪孤憤
無復褰區過八音
聖德神功俱泯滅
英雄千載一沾襟

詩話此詩蓋聞庚申君之訃而作也是歲庚戌
北元人謚曰惠宗其子嗣立於應昌改元宣光

頌示高麗高麗不奉詔故云無復寒區過八音
既而北元主走和林沒諡昭宗見鄭麟趾高麗
史

王

旬一首

旬字子宣

詩話高季迪以詩得妻王子宣亦以詩得妻子
宣宮詞諸家多誤作王叔明詩謂仁和俞友仁
見此詩歎賞曰唐人得意句也遂以其妹妻之
考凌彥紳柘軒集有悼王叔明室張氏詩云結
髮為夫婦齊眉若主賓山同黃鶴隱書逼彩鸞
真蘭樹人皆羨蘋蘩爾獨親情傷坦腹者臨穴
重沾巾則叔明娶於張非
俞也故定以為子宣作

宮詞

南風吹斷采蓮歌夜雨新添太液波水殿雲廊三十六

不知何處月明多

高廷禮云婉麗絕似王龍標李時遠云盛唐音響所謂十首不為多一首

不為少也陳卧子云亦杜牧李益耳何遜盛唐然景調俱佳嚴蔭友云子宣宮詞不可謂不工矣然不若薩天錫之入妙也薩詩云清夜宮車出上央紫衣小隊兩三行石闌干外銀燈過照見芙蓉葉上霜

李

鐸一首

鐸字振道隴西人

詩話吳人徐達左良夫司訓建寧游乎武夷寫九曲樵歌圖書皆賔吟詠於前自紀其後復屬

同人題句卷後題者隴西李鐸臨川劉廬浚儀趙友士西甌馮回括蒼張思齊鉅鹿林熙樵川蕭子和龍伯章隴石李裕三山周關甌寧葉俊建安楊恭葉李原蘇梓葉銘葉勝李佑龍虎山人梁鵠凡一十八人續題者良夫兄子徐濟及青城王璵也良夫居太湖之濱光福市間耕漁軒以延名士集其詩文為金蘭集其好事亞於顧仲瑛云

題徐良夫九曲樵歌圖

徐君江海人雅有山林想遠遊賦幽尋徘徊耽征鞅長揖虹橋仙飄飄欲偕往牽舟汴岸迴著屐緣厓上萬壑風泉潄層巖土化長采鸞載玉笙隱隱遺清響幻迹杳

難窮真源豁而敞永懷紫陽翁欣然契心賞

馮回 一首

回字景淵福寧州人

武夷大王峯

亭亭大王峯壁立何峴岼昔聞武夷君於茲脫真骨鳳
駕杳不還虹橋忽焉沒惟餘巖際松年年挂秋月

葉俊 一首

俊福寧州人

武夷

武夷山下萬年宮
九曲溪頭一棹通
流水落花尋古道
平林過雨見羣峰
幔亭人去雲連壑
華表仙歸月滿松
正好相期問丹訣
天風午夜客船東

汪德懋

一首

德懋名天應以字行
休寧人環谷東山弟子

和商山書院諸公韻

覆雨翻雲已十春
恨無詩酒對芳辰
秦疆再世終歸漢

周弱何人共戍申邊境旋聞烽火息南風喜見稻花新
為霖更得成豐歲願作陶唐擊壤民

田子貞

一首

子貞寧波人

題安分軒圖

一室蕭然萬慮忘幽棲真似斛斯莊春晴野澗多藜藿
秋晚山田足稻粱待富却慚居易拙送窮應笑退之狂
看君已在義皇上老去從教白髮長

趙次誠

一首

次誠字學之樂清人有雪溪集

早梅

江南冬十二月溪上梅三兩花載取小舟香影月明獨

權回家

杜伸之

一首

伸之溫州人

感興

吾昔搓長絲繫彼渭川竹直釣魚不吞何以充吾腹此
心苟無嗜藜藿亦自足寧使不得魚吾釣終不曲

李應期

一首

應期字均饒瑞安人有菡翁集

寄吳彥升

積雨連朝過客稀亂紅墮地綠陰肥江南祇是歸耕好
水遠孤村燕子飛

范宗暉

二首

宗暉以字行寧波人

詩話范君詩載滄海遺珠亦徒於湏者

古意

積雨可沉舟羣輕能折軸
巧言必譎張利口多翻覆
苟不塞其源涓流蔽川谷

稂莠終亂苗珉瑜頗相類
君子與小人顏面亦不異
辨之如不早斯為名德累

李道生 一首

道生字本立休寧人有清意味集

雨後

山中曉起喜新晴杖屨尋詩獨自行
幾樹好花春盡發隔溪流水夜來生
游絲拂地應千尺啼鳥喚人時一聲
趁暖田家曝蠶種明朝節候是清明

劉逢原 一首

逢原字資深會稽人

挽鐵厓先生

已矣楊夫子春秋天下名醉生唐李白節死晉淵明雲
暗九山碧水洄三泖清游魂招不返悽惻故鄉情

周

翼

二首

翼字子羽無錫人

中秋與楊氏昆季泛舟鵝津

八月十五夜何其鵝湖漾舟人未歸水生金浪兼天涌
雲度青冥傍月飛鴻鴈沙寒微有影芰荷秋冷不成衣
故人一去渺何許黃鶴舊磯今是非

鴈來紅

翔鴈南來塞草秋未霜紅葉已先抽綠珠宴罷歸金谷
七尺珊瑚夜不收

王中五首

中字懋建

黃俞邵云洪武辛亥進士有沁水王中甲戌有同安王中未知即其人否

要不敢以
臆定也

中秋述懷

潦倒羈棲客傷心兩鬢華塗窮惟有淚世亂更無家暗

雨聞寒鴈悲風急暮笳艱難今一槩何處問生涯
天下兵長鬪山中客未歸塞鴻南度早星使北來稀草
草年光換悠悠世態非自憐同社燕幾處傍人飛

黃家洲客舍留別

數載俱流落相逢鬢已秋生涯同寂寞書劍祇淹留沙
澗隨天盡江平帶日流別離殊不愜回首思悠悠

田家雜興

煙火中林靜秋風歲律賒清霜催橘柚落日照薰葭石

徑通流水山橋卧古槎武陵非境外不必問桃花

泊鏡口

日暮風濤穩扁舟泊此隅雲山歸夢杳鄰舫語音殊片
月寒江永平沙旅鴈孤無才合漂泊不敢恨窮塗

陳安 二首

安字克盟

中秋有感

畫省曾陪冠蓋游華筵詩酒宴中秋星河不動天如水

風露無聲月滿樓
皓齒纖腰催象板
珠簾涼影上銀鉤
於今寂寞江城暮
烏帽西風歎白頭

題高理瞻所藏小景圖

昔年為客楚江邊
雨霽江南二月天
楊柳畫橋深淺水
桃花春岸往來船
新篳白酒浮杯釀
旋買青魚出網鮮
因見畫圖驚舊夢
東風吹面鬢蕭然

錢子義

一首

子義無錫人

題畫

夕陽淡淡雨絲絲
遠浦長天欲暝時
腸斷楚山春雨後
鷓鴣啼向女郎祠

梁蘭

七首

蘭字庭秀一字不移
泰和人贊善潛之父
有畦

樂先生集

王希範云先生養高丘園
撫悠遠之思著為詩歌曠然有古高士之節

王達善云畦樂先生之詩出於自然
默契靖節於千載之上胡若思云
誦先生詩蕭散閒淡之趣悠然於篇詠之間
鄒熙仲云梁君隱居樂道其詩冲澹閒雅
有自得之致

西畦自適

守拙一圃閒，衡從五畝餘。
藝麻在高丘，雜以果與蔬。
春至百草生，趁晴聊荷鋤。
筋力豈不勞，蕪穢亦以除。
家人會知我，慰以酒滿壺。
偶坐斟酌之，日落西山隅。
歸來北窗下，我心一事無。

留別楊分昭

君還既不久，我行復有期。
憶昨君未歸，日久徒憂思。
忽聞車馬來，僮僕走相隨。
入門一會面，酌我金屈卮。
人生

最歡樂莫若新相知歡樂苦不長明當與子辭大夫且
行役敝車日驅馳吾徒本貧賤奔走何足悲但恐後來
時君將復何之

題素扇

團圓復團圓月圓尚有虧致身君懷袖無有盈虧時知
君重貞素采色亦不施物微幸相親願言常自持寒暑
固代謝用舍適其宜古來婕妤怨此意君諒知

荆湘道中

江入瀟湘近山連楚塞高兩厓如積鐵一水不容舫慣
客寧辭遠藏身豈憚勞同門多宦遠漂泊媿吾曹

寄劉珪

春日已多夏日臨輶輶晝啼苦竹深野棠雨餘新水綠
石壁樹杪浮雲陰安知天地有終極不覺歲月還相侵
我思劉郎何可見徒使遲迴勞寸心

寄呈東原公劉子彥

北闕前年一上書歸來高卧楚郊墟西風短褐雙蓬鬢

落日空山一草廬道直不殊梁太傅賦成端擬漢相如
別來又是春三月盡日逢人問起居

客舍秋雨

燈前細雨夜初闌枕上聞雞夢轉難壯節豈因今日改
旅懷纔向故人寬江天雨色連窗白草樹風聲入室寒
景物已殊歸計遠殘年飽飯共相看

陳

綱 一首

綱字簡文嘉興人布政約弟

題畫

五湖煙水漾生波一葉扁舟鼓枻歌
愁殺故園戎馬後千章喬木已無多

陳緝三首

緝字熙文綱弟

沈客子云四陳之中熙文詩秀雋可誦直逼晚唐

和大兄八月十四夜月

桂老金為粟蟾孤玉作團明朝應更好此夜不勝寒弟
妹他鄉共闕山幾處看南飛有烏鵲未得一枝安

春日

湖頭誰復載吳娃
鷗鳥多情戀白沙
涪萬春深無杜宇
武陵何處有桃花
雨餘石燕晴歸穴
市近山螽午報衙
看到前朝丞相墓
野人翻土種桑麻

竹枝

贈君曾出雙南金
別君曾彈紫綺琴
斷金還比阿儂意
斷絃持比阿郎心

鄭 濁

一首

瀾字仲養浦江人

詩話浦陽義門有三其一黃氏自度至逢吉其一王氏自芟至子覺皆止數世而已惟麟溪鄭氏族大且久先世自榮陽徙歙再徙睦州其居麟溪自淮始淮之孫綺乾道中賜號冲素處士朝請郎新淦晏穆志其墓是為義門第一世綺之子聞聞之子運運之子政政之子德璋德璋之子文融文融嗣子欽仲養蓋欽之叔子也凡十三世一十六百六十餘年逮元季明初門才益盛曰深曰瀾曰源曰濤曰泳曰渙曰淵曰湜曰濟曰洧曰濟曰湜曰沂出處不齊先後以才行著一門羣從又有櫟槌枅枋材彬榦楷模桐柑棠機柏栳木皆為士林所重於是公卿大夫先後詩文貽贈者編為麟溪集二十二卷洵盛事矣嗟乎江湖日下褻鈿德色箕帚踞罵其不

為秦人之續者幾希錄
義門子姓詩為之三嘆

海棠仕女圖

東風蕩漾百花潭
翠袖迎風酒半酣
好鳥隔窗催曉色
美人殘夢到江南

金敬德 一首

敬德樂清人

鄭宜州蘆花淺水亭

新築茅亭也自幽
闌干曲曲面滄洲
一簾花氣都成雪

片石潮痕祇沒鷗客醉有時迷夜泊月明無處覓漁舟
老夫亦有滄浪趣便欲移家住上頭

吳子莊

一首

子莊溫州平陽人

小景

杖藜日日看芝山山下浮雲共往還昨夜小溪新水漲
釣船流到寺前灣

黎昶

一首

昶字伯輝清江人

同安謠

黃雲漲空雪欲飄
長江落日生暮潮
同安城頭獨延佇
悲風拂鬢寒蕭蕭
布蓬老翁年七十
鶴髮鴟衣道傍立
倚筇為我說興亡
含憤未言先涕泣
前朝值亂戍守奔
土豪割據何紛紛
攻城拜將爭殺戮
同安賴有余將軍
將軍秉心盡忠義
訓練民兵久精銳
城邊掘壕深百丈
城上嚴更列旗幟
朝廷消息久莫通
江襄羣盜矜豪雄

樓船萬甲氣如虎戎衣染遍秋江紅將軍此時力匡國
執銳開闕屢迎敵鐵騎交馳白日昏雕戈上指青天折
縱陽門前殺氣高奮身寧辭征戰勞江淮黎庶半為鬼
僵死卧骨填空壕同安拒守經七歲破圍不見官軍至
銅柱難成馬援功睢陽不屈張巡志一朝羣盜登城闥
揚鞭百里飛紅塵疲兵裹割不能戰計窮豈願圖全身
將軍挺身出帥幕竟逐飛星陣前落半夜精靈出戰營
千秋廟食依江郭聖人一出寰宇寧鳳麟應瑞黃河清

當年逃亡命如蟻豈期年老逢昇平荆棘連雲戰爭地
近來茅屋方成市山鳥如呼者舊名江流尚帶英雄淚
當年繁華何足論聞翁此語傷吟魂樓臺盡隨灰燼滅
人物風流今幸存尊前感慨應未已宦情總付東流水
長歌因賦同安謠留與他年入詩史

梁 闕 一首

闕字用行會稽人

哀余左丞

世人孰不死死義心所安苟非明至理捐軀誠獨難偉
哉青陽公忠義為肝膽伊昔奉朝命宣慰淮西藩遭世
方板蕩荆襄肆寇殘公時在安慶寧忍視民患率衆力
拒敵奮怒髮衝冠抗節守孤城援絕糧饋殫勢迫不獲
已慷慨就清瀾妻孥亦同逝恥受污辱干我昨聞其風
慨然發長嘆丈夫有如此何媿天地間遠繼張許流千
載名不刊

王珙

一首

珙字廷珪常熟人明初處士有竹居詩集

王汝嘉云

竹居道者詩無雕琢浮靡之習有渾厚淳雅之氣
張宗海云處士治生富贍構幽居於深竹

之中詠歌其情思詩皆和平之語治世之音
除以恭云先生詩富麗清奇如秋月春雲起人

景仰
李世賢云王君卜宅於虞山北之蕭溪植竹萬竿容與其中興之所寄輒形吟詠其詩

和平典雅質不近
於俚淡不流於枯

詩話竹居治生之餘不廢吟
詠華幼武一流也詩嫌太熟

溪橋晚步

日日陰雲思寂寥偶因新霽過溪橋不知門巷春多少

柳外一聲婆餅焦

陳川一首

川天台人

題夏圭溪山清遠圖

我家東南丘壑好
曲折雲林護危杪
澗沙流水春自香
石楠碎葉秋如掃
縛柴野橋松雨涼
鳴鐘破寺茶煙杳
山椒茅亭如笠大
石腳魚舟似瓢小
人家制度太古前
雞犬比鄰往還少
酒杯吹香小店門
落日漁樵多醉倒

六年不歸長夢見白髮忘情負魚鳥晴窗見畫三摩挲
舊夢微茫今了了不知何處得此圖覺我山居殊草草
安得溪南寫石田更携妻子從茲老

陳汝楫

一首

汝楫字濟明蒲圻人洪武初舉明經授徽州府
通判轉泰州茶馬司謫知渭南縣遷廣平知府

桃花泉

桃花流水合荆溪夜雨春波拍斷隄偶爾今朝出門望

平疇雉雉麥初齊

李

弘一首

弘字德庸蒲圻人洪武十九年授本縣訓導尋遷國子助教

西良湖

蕩舟歸去月黃昏湖上人家半掩門
漁笛數聲何處起
冷香一樹玉梅根

王叔舟

一首

叔舟浮梁人洪武中以獻雪詩授徽州同知

三月三日雪應制

柳絮飛還早梅花落太遲天顏多喜色瑞氣滿瑤池

明詩綜卷十六

欽定四庫全書

明詩綜卷十七

翰林院檢討朱彝尊編

鄭

梃

二首

梃字叔高浦江人元宣政院使渭之子

擬古

二首

秦箏一何哀中有淒涼音累累孤臣操咽咽嫠婦吟晨
霜為之寒浮雲為之陰聽罷復三歎不覺淚沾襟披衣

步庭皋嘉樹鳴曙禽嗒然吾喪我情與海水深
孤齋悄無人絳燭夜吐芒羽蟲忽飛來投火欲自戕知
為明所誤曷不務韜光子房願封留淮陰喻弓藏法戒
既昭然昧者何茫茫高山有白石行當煮為糧

鄭 杖 一首

杖字叔韓挺之弟宋學士女婿也有學古齋集
懷宋學士

亦知離別遠喪亂近何如流水天涯路征鴻塞外書
縣

繇飛雪晚點點落梅初日月重回首那堪已歲除

鄭幹一首

幹字叔恭亦槌之弟從宋學士游永樂初以薦授監察御史

詩話叔恭宣撫廣東民以取珠為苦至即奏罷永樂十二年已七十有二矣值長陵埽平沙漢因進五言詩帝歎曰可謂滿朝詩伯第一叔恭因告歸帝予敕書許致仕賜宴於禮部界以金繡衣問誰可代者叔恭舉從子煇御筆即除御史義門詡為盛事

寄宋仲珩

鷺斯桑下飛青鳥海上游如何不同調羽翼有短脩故人昔相見時時話綢繆出入念同車無衣念同裘一朝參商如豈不懷百憂初盟儻不渝在遠情愈周但願似風昔烏用苦相求

鄭桐

一首

桐字叔成幹弟洪武中以薦授滁州判官

春思

梨雲淡淡霧濛濛人在青樓第幾重鸞鏡未開簾未卷

羅衣先怯五更風

高伯恂

一首

爵里未詳詩見光岳英華

寄梁紹輝

花時醉裏匆匆別回首西風錦樹秋
明月相思隔江浦
素書不見到林丘
松陰塵榻晴還拂
池畔清樽晚更留
山水閒情宜共賞
碧雲涼鴈思悠悠

梁紹輝

一首

未詳詩見文翰類選

登小孤山亭子

飛亭結構半山隅
雲影天光入畫圖
清漲九江吞漢沔
高標孤柱限荆吳
風來舟楫歎危疾
雲暗魚龍變化殊
獨倚畫闌吟不盡
白雲飛去寸心孤

張迪

一首

迪字文海華亭人

宋徽宗畫半開梅

上皇朝罷酒初酣
寫出梅花蕊半含
惆悵汴宮春去後
一枝流落到江南

章

閤

一首

未詳詩見皇明風雅

送張二貢士

煙靄散春晴
亂鴉深樹鳴
千山懸落日
一騎出孤城
急管催離宴
飛花惱客情
殷勤懷上策
謁帝向承明

王

超

一首

未詳詩見荆溪外紀

張緒歸舟

落日半帆收
張溪古渡頭
花明汀樹雪
香冷渚蓮秋
碧浪搖檣影
青山枕舵樓
曾知風景好
記此一停舟

黎充輝 一首

充輝字睿之臨江人

府志云充輝名慎

山雲辭將歸作

清江兮淙淙上有山兮穹窿
白雲兮谷口一碧兮千峰

晦靄兮絕壁挂偃蹇兮長松朝迎兮秋陽暮卷兮秋風
山之人兮雲從被薜荔兮牽芙蓉來乘雲兮朝九重跨
一鶴兮江東點汀花兮白蘋雨霜葉兮丹楓忽雲歸兮
人遠山蒼蒼兮倚晴空

丘輔仁

一首

輔仁字友文歸安人

詩話友文少行至行不樂華靡母衣之以絺帛
赧顏不服長傳通經史配為章句之學潘元明
據湖州使人召之亡去洪武初
始歸里業農終其身詩集失傳

南湖

南湖二月水如天
羅綺東風醉少年
十里好山都看盡
琵琶催撥夕陽船

謝林 三首

林字璚樹武進人
應芳子有雪樵集
煮雪窩稿

詩話璚樹名林本係一人
列朝詩集複出誤也

潁城鳳凰臺

鳳凰臺臺何高野
雲黃葉風蕭騷
不聞孤鳳鳴但見鳥

雀棲蓬蒿梧桐摧折傾舊巢鳳兮何處翔赤霄無由再
覩兮使我心勞

梳洗臺

雲為裳月為璫鄭姬不見臺已荒千年臺下土花碧猶
帶洗時脂粉香今古繁華易衰歇溱洧水流聲鳴咽曾
識宮中歌舞人只有臺前舊明月

青城虞勝伯顏丘氏小軒曰看帆為賦律詩因以
寄予次韻錄奉彥章

風帆已逐歸雲盡
江水何如客意長
荏苒歲華駒過隙
飄揚生理鴈隨陽
從知白髮非春事
醉看青山即故鄉
獨笑夢中忘未得
落花風起動回檣

張端義 一首

未詳詩見鐵網珊瑚

送張吳縣之官嘉定分賦得錦帆淫

風吹闔閭城花落
錦帆淫錦帆去不返
春流日夜生故人
在何處恨滿城邊路
月明烏夜啼霜冷
丹楓樹淫水

抱城流直通東海頭布颿挂落日相送練川游

徐文舉一首

文舉武進人

賦得百花洲

春花迷繡幄春水漾金鳧照影和明月流香過石湖錦
帆應不見沙鳥自相呼感舊復傷別愁傾雙玉壺

詩話金壇張德常起家吳縣丞歷縣尹遷嘉定州
同知其行也諸名士分賦吳中舊蹟送之廣陵
陳廷珪得龍門廬山陳汝秩得采香迳宛丘陳
秀氏得靈巖吳郡鄭元得越公井錢唐范致大

得石湖江陰張端得林屋館青丘劉埙得虎丘
太原王逢得劔池蘭丘聶鏞得天平山四明陳
朴得白雲泉會稽張憲得吳王井四明陳桎得
太湖石勾吳周砥得洞庭山晉陵張體得琴臺
巴西鄭德基得玩花池清河張端義得錦帆注
崑山盧熊得館娃宮吳郡王行得放鶴亭渤海
高啟得響簾廊高郵龔宜得梧桐園吳郡黃本
得白公檜延陵徐文舉得百花洲江陰張瑄得
采蓮汪海昌董翔鳳得辟疆園無錫顧常得夫
椒山而遂昌鄭元祐亦賦采香注且為之序卷
中賦鱸香亭者脫去姓名吳人
未存理編鐵網珊瑚具載其詩

余詮一首

詮豐城人

海水操

陳母莊傷其夫溺死於海作

海水蕩滴兮茫無津涯夫君一去兮杳無還期為死為
生兮曾莫我知欲往從之兮襁褓有兒同室同穴兮我
志獨違恨深海水兮曷其已而

劉堧一首

堧字公坦江陰人

題東章孟山水

廬江公子稱三絕詩妙書精畫亦工落筆多宗董北苑
高情不減米南宮天低碧樹春雲合潮滿滄洲暮雨空
却憶買船同載酒城樓山館醉東風

茹湜一首

湜字季清無錫人有爪膚集

楊白花

楊白花身輕不由已一夕長風生飄飄度江水江南處
處好繁華悠揚落地知誰家知誰家不復歸永巷春深

人迹稀悲歌連臂空腸斷回首長秋鵝亂飛

馬

麋

一首

麋字公振崑山人有醉漁草堂二集

和楊廩夫新居韻

楊子樓居飲馬河書舟日日樣晴波未論粟里功名薄
總為夔州詩句多遠樹入簾秋若薺亂雲渡水白於鵝
何當共把凌風袂醉和仙人鐵笛歌

蕭

岐

一首

岐字尚仁泰和人明初以賢良徵為潭府左長史固辭謫楚雄儒學教授改平涼學訓導有正固先生集

入閩

自入閩中道偏諳物外情田從山下種船向石稜行海味空多族榕根盡倒生連城公館好驛使遠相迎

顧協五首

協字允迪無錫人貢監生有鳴志集

詩話允迪以諸生貢入成均詩有脫却朝衣換
布衣之句則亦通朝籍者詩頗清穩五言如亂
峰烟外紫殘日
樹頭黃佳句也

待鶴

白鶴去何之想在蓬萊頂月下漫沉吟衣沾露華冷夜
久不歸來立盡青松影

次錢助教見寄韻

窮巷誰相問蕭條獨掩扉雨中花旋落江上燕初歸計
拙身從嬾才疎事轉違思君長入夢莫怪往來稀

送張翰臣幕掾還廣西

曾持刀筆贊元戎，不數區區野戰功。
青鬢消磨千嶂外，舊文零落十年中。
雪晴官路梅花白，雨熟蠻鄉荔子紅。
三十六原何處是，馬蹄輕踏綠楊風。

舟中次韻

西風吹老白蘋花，獨倚歸舟感物華。
漠漠秋雲暗山谷，不知何處是吾家。

孟夏書事

脫却朝衣換布衣始知今是昨來非綠陰庭戶無人到
惟有一雙新燕飛

陳鈞一首

鈞字衡臣羅源人洪武中以人才薦官建德縣

丞有退軒集

徐器之云衡臣詩體
法聲調一歸於正

題金山壁間畫

空翠忽入戶飛來何處峰人家多傍樹僧寺不聞鐘流
水衝橋急閒雲出岫慵何當撫琴坐願學卧遊宗

鄔修一首

修字存誠南昌人洪武丁丑進士歷官太平知

府

中秋分韻

秋月已成規秋闈猶列戟妙契結金蘭今夕是何夕時
序有代謝情懷增感激對酒發新吟此樂良難極

劉欽謨云

沖澹和平

詩話草除四載文獻無徵成化初吳人劉昌提
督河南學政得建文元年湖廣鄉試棘闈倡和

詩集中作者豫章胡儼若思鄒修存誠廬陵謝
矩子方陳孔正閩鄱陽洪初善初閩張勉學
思哲江陵熊釗伯機蜀川郭璉孟溫翦潮貴廷
輔會稽陳安惟康馬文炯關三衢張起師震
何遠思道清江袁士誨文政郢簡王景應星萬
川冉通顯達桂林唐昉景升維揚李駘文載柳
州莫忠彥良容山周迪遵道廣饒袁本子中凡
二十一人昌鏤板以傳且序之曰是科所取第
一人實太師石首楊文定公而胡公評其文謂
能董子之正言不效公孫之曲學者愚按福建
是科領解則建安楊文敏公明年文定文敏俱
成進士而胡文穆廣金文靖幼孜胡忠安淡顧
端肅佐皆建文
庚辰榜釋褐者

卞
同
一首

同字孟符吳人

倪雲林畫

雲開見山高木落知風勁亭下不逢人斜陽澹秋影

梁

梁

一首

梁字弘字南海人

寄董宗輔

東江去悠悠送子孤行舟舟行復幾時江鄉生遠愁海
水無定影萍踪忽飄浮雖非千里別出門成久遊采采

芙蓉花欲寄無輕郵念昔携好手中情鬱綢繆商歌寄
逸響素琴鳴芳洲如何曠高躅杳若隔山丘馳情託絨
素日暮風颭颭無由慰離索一鴈橫高秋

王敬中一首

敬中字敬中鄞縣人洪武辛亥進士刑部主事

題丹丘

四窗山色可攬秀雲根石屋高嶙峋林間遺鳥曾化虎
洞口獼猴渾似人奔流直下幾千尺高蹈今逾四十春

靈光夜夜照丹室應有飛仙來往頻

陶琛二首

琛字彥珩吳縣人

過徐良夫耕漁軒次倪元鎮韻

西山久思往經春復逾秋迴看岸傍樹尚繫煙中舟日
月倏飛騰不異川波流至今遠游興浩然殊未休東風
江上來沄沄水生洲便欲引雙屨飛行紫巖頭如何苦
蹉跎徒睇雲路修谷鳥在林杪鳴聲亦相求今君展清

讌胡不邀同遊開館集羣彥翩翩文采優相逢尚難得
况茲旬日留惓然對樽俎情意兩綢繆嗟彼丘壑賞豈
顧茅茨幽愁來發清詠獨倚城南樓

詩話吳中徐達左良夫耕漁軒名士留題甚衆
朱德潤澤民為作圖仇機沙大用作傳高遜志

士敏作記唐肅處敬作銘王行止仲作序楊基
孟載作說釋道衍作後序因編為金蘭集其十

二世孫大業受業於予出先代所遺詩箋百餘
幅正草篆隸靡所不有如來筭然皆元季明初

諸公手蹟也未幾以訟破家悉為有力者所得
過眼雲烟不復可覩矣惜哉自陶琛以下三人

均集
中詩

題江參長江圖

石出夜潮落山明寒霧消江空千里櫂村迴一歸樵樹
色連沙嶼人家傍野橋還同舊樓地風景日蕭蕭

余震

三首

震字以聲

九月廿一日偕范孟學李德興訪徐良夫耕漁軒
是夕乘月過溪寺登擁翠方丈分韻得下字

商飭發清秋孤月耿深夜玄賞悟真情況茲幽林下蕭

蕭殘葉飄瀏瀏飛湍瀉驚鵲鳴高枝流螢繞空榭芳絃
既已歇佳詠豈云罷復與道人期逍遙宿精舍

月下聞琴別邵先生包秀才

孤光澹燈室微煙繞香几誰彈膝上琴夜半離聲起瑟
瑟度涼風泠泠寫秋水流音松竹外却憶空山裏

過邵弘道先生墓次韻

孤墳四尺鳳崗前此日重來又一年新土有痕分草色
舊蹊無跡長苔錢殘花自落山中雨遠樹空迷嶺外煙

回首令人多感慨賦詩揮淚寫長箋

董遠

一首

遠字仁仲

城頭烏示良夫

城頭擊柝邊月低啼鳥繞樹寒不棲
天邊明星白如月
空階落葉風淒淒房帷靜悄夜何永
青燈無眠照孤影
蠨蛸在戶人未還關河十月衣裳單

謝常

三首

常字彥銘吳江人洪武中舉秀才召試丹鳳朝陽賦稱旨帝欲官之辭歸隱震澤東溪有桂軒

稿東溪集

詩話彥銘楊廉夫弟子詩尚纖麗縣志稱洪武末舉秀才帝欲官之辭疾不拜考集中詩事在洪武十五年八月其詩云歸養慈親荷聖恩喜傳天語出金門河陽敢問花誰種彭澤應知菊尚存則以養親辭非以疾辭而所辭之官似屬縣令也又寄靈谷定巖長老詩序云不肖衰朽目昏鬢毛皆雪幸有老母百又六歲荷蒙恩渥勅許終養足為明證矣集又有永樂元年八月陪祀縣庠丁祭及鄉飲分題之作句云喜當時盛陪清列或者曾攝邑校耶

竹枝詞送別

闔閭城邊楊柳黃
吳姬如花明月璫
送郎不勸銀餅酒
持贈雲鬟金鳳皇

和靖觀梅圖

孤山歲晚水迢迢
竹外橫斜挂綠么
吟到暗香疎影句
黃昏月上雪初消

携琴訪友圖

秋林紅葉晚蕭蕭
乘興携琴過野橋
人在翠微尋不見

白雲如練束山腰

吳中一首

中字宗本自號青霞處士有林霏集

白鶴山

吳興多名山茲峰特奇秀不知自開闢陰陽幾昏晝云
有未髭僧冥棲刻蓮漏香臺儼有在祥室已新構松下
伏神龜竹間走飢鼯白鶴不受招仙蹤亮難究伊昔屢
登臨空翠濕衣袖窮搜不知疲幽討寧嫌逗巖扉與澗

戶一一為重叩和詩寄山靈餘生敢多又

劉子建

一首

字里未詳

浦城漫興

清溪何似百花潭谷口雲峰半夕嵐
偕問子真歸隱未
鷓鴣春雨滿江南

謝

恭

一首

恭字元功長洲人徽弟有蕙庭集

過張水部樂園林館和高季迪韻

故人非傲吏，舊隱勝愚溪。塵世人難到，空林鳥自啼。青山懸榻下，綠樹斷厓西。終日無餘事，長吟信杖藜。

潘子安

二首

子安和州人有海天清嘯集

詩話子安詩見湖海耆英詩集其字未詳吾鄉
邵氏書畫跋載有潘伯濟題畫詩云全篇清婉
輝其名字疑是一人然未
敢臆決附錄之以俟再考

九日王時融招飲

喜見長筵破曉風忽移春暈上衰容故人已覺樽前少
佳節偏於客裏逢千里暮愁連蟋蟀無邊秋色醉芙蓉
而翁此際登高處應在三山第一峰

題畫

岷峨雪消春水急瀟湘雨餘雲樹濕迢迢翠嶼孤鶴迴
湛湛珠宮老蛟泣征帆數點風濤中出沒不計天西東
鄉關杳渺在何處矯首遙送雙飛鴻

陳士楚

一首

士楚揚州興化人

書錫山驛

嗚嗚畫角冷涵秋一曲梅花動暮愁
不管江南斷腸客
夜深吹上月明樓

沈應

三首

應字德虔吳縣人

元夕

燈月滿春城金吾縱夜行
誰家無畫鼓何處不銀箏
願

以昇平樂懽歌答聖明

次錢文伯題雲林詩韻

紅葉橋邊草舍低
半灘斜照水平溪
舊時曾記題詩過
疎雨桐花一鳥啼

看山

老年已免綴朝班
林下於今許我閒
流水小橋紅葉逕
杖藜隨意看青山

史謹一首

謹字公謹崑山人

過七星關

萬里投南徼層關度七星嶺雲和瘴黑木葉向冬青路
遠家難問愁多酒易醒相逢但樵牧何以慰飄零

朱武一首

武字仲桓紹興山陰人

張子正春雨鳴鳩圖

東風簾卷小紅樓三月梨花喚錦鳩曾記玉人將鳳管

隔花低按小梁州

吳倫二首

倫字文伯吳人

茗溪春曉圖

夜聽溪上雨曉看溪上山雨歇山更佳尚在空濛間白雲掩疎鐘綠樹迷遠島居人想未起村村自啼鳥

賦得秋江送別

秋陰日易夕江空歲云晏惻惻傷物情悽悽屬昏旦聳

秀林際峰流響雲中鴈煙蕪銷遠綠霜楓炫餘粲時芳
遞衰榮人事更聚散方敦金蘭契遽念蠨蛸嘆夙駕嚴
霜寒晨起明星爛揚舳子夷猶伏枕我羈絆那知惜睽
離矧復值憂患秋吟不成章一辭媿莫贄

徐基

一首

基字立本臨海人

寧海道中

中歲事行役勞生卒未休大星垂野白遠水際天流土

俗魚鹽富民居橘柚稠何年謝塵鞅歸卧此林丘

陳文東 一首

文東字同闕松江華亭人

宿陝州橫渠鋪

獨客卧車上羣僕卧車下車前或明火時時照牛馬

朱希晦 三首

希晦樂清人有雲松巢集

詩話處士元季與吳主一趙彥銘隱居鴈山時
稱鴈山三老明初不仕有薦於朝者朝命未至

而卒集為七世孫玄諫刊行其夏日書懷云白
髮生涯人已老綠陰時節雨偏多寄友云煙色
春歸楊柳底雨香紅入杏花初傷時云城邊向
晚黃狐立海外何年白雉來自歎云家貧捐具
千金帚國難曾無一箭書訪僧云松陰夜
靜鶴初警花院日長僧未還皆佳句也

客邸中秋對月

去年中秋秋月員浩歌對酒清無眠煙霏滅盡人境寂
仰看明鏡懸中天今年客裏中秋月靜裏金波更清絕
可憐有月客無酒不照歡娛照離別夜闌浙浙西風涼
月中老桂吹天香悠然長嘯動歸與坐久零露沾衣裳

浮世悲懽何足數
庾樓赤鉞俱塵土
風流已往明月來
山色江聲自今古

納涼

無事解衣坐超然
心境空深林翳炎
日萬壑來天風閒
傳白羽扇拂拭朱
絲桐醉罷不知夕
月生滄海東

寄友

雨過溪頭鳥篆沙
溪山深處野人家
門前桃李都飛盡
又見春風到棟花

甘復二首

復字克敬餘干人有山窗遺稿

曉出西園由谷中歸

披褐陟西園
煩襟散清曉
微風動高樹
零露下芳沼
始行幽谷中
忽出清林杪
流水漂餘花
修筠度啼鳥
身緣翠石迴
思逐白雲杳
負杖孤賞懷
春闌綠陰悄

送別

涼颼應秋氣
草木歛華英
客游總念歸
子有千里行
息

恩儔侶催悄悄離思盈丈夫懷志氣孰不戀榮名華薦
起當路使者促前征追餞東門道把酒哀絃鳴蕭條野
驛暮泛灩江波清密謀植帷幄慰彼蒼生情古來盛名
士多是起釣耕

鄭洪二首

洪字君舉永嘉人有集

詩話鄭君舉詩一卷曹侍郎古林藏本侍郎題
是永嘉人而鮮于伯幾書趙子固水仙卷稱元
貞二年正月同餘杭盛元臣三衢鄭君舉觀于
因學齋初疑君舉乃三衢人然考周玄初來鶴

詩有永嘉鄭洪君舉之作見鶴林類集則君舉
為永嘉人無疑來鶴事一在至正十七年一在
十八年一在洪武十四年一
在十五年一在二十七年

吳山白塔寺

江山襟帶尚依然王氣銷沉已百年八葉龍孫東渡海
六宮虎士北歸燕銅駝荆棘荒山裏石馬莓苔落照邊
玉匣游魂飛劫火五陵無樹不啼鵑

寄毛府判

南湖水長沒蕪葭西浦橫橋對白沙鴻鴈來時菰有米

鳳凰飛去竹無花
石田賦寫張平子
雲閣書通蔡少霞
零落江陵千樹橘
青門猶戀故侯瓜

朱友諒 一首

友諒常熟人詩見鶴林類集

周尊師禱雨歌

道人鞭龍出潭底
黑雲一片山頭起
仰看紅日不見光
黑龍頭搖白龍尾
有時登壇步七星
一呼一吸成雷霆
白波翻空海水立
銀河落地天瓢傾
去年京師禱雨雨

輒至大田小田總霽霈定知夜半拜封事自有精誠感
天地王公貴人知其賢屈師闡教來琴川今年旱魃又
為虐禾稼半死民熬煎縣官投詞庶人跪道人受命應
且喜笑書鐵牌役海鬼疾驅一百五十里甘泉龍居萬
丈深神符召集如飛矢今朝雨脚來自南半是吳江四
橋水頂山有龍名大白口喚湖水成甘澤道人驅龍唱
龍出五雷使者閒不得龍兮龍兮一喚日失色金蛇掣
電光千尺再喚山氣黑飄風盤旋走沙礫上天有寶不

愛惜噴下驪珠千萬石兩龍行雨勢未休須臾潦水平
田疇疲農入城報沾足道人一笑山雲收

詩話尊師世居嘉禾從紫虛觀李拱瑞為道士
李南谷杜真人高弟也周伯溫紀畧云先生受
法於顧養浩步雲岡雲岡受之張雷所雷所受
之王繼華繼華受之莫月鼎宋景濂傳畧云雲
川有莫洞一授其徒王繼華繼華授張善淵善
淵授步宗浩宗浩以授尊師禱雨事一在洪武
元年一在二年永嘉鄭思先序之思先詩云道
人綠鬢雙青瞳自言前身河上公歛騎黃鶴辭
帝宮歸來塵世發羣蒙海虞福地秀所鍾七星
老檜摩蒼穹道人重來御冷風屠維作噩歲武遂
季夏旱燥何熒熒縣令延師師說從飛書上奏
敝九重鐵券怒起神淵龍左驅飛燕右豐隆

天地俄頃驚晦蒙甘露注地疾若春千村萬落
沾涯同頃回枯槁蘓痲瘡旋斡造化非常功道
人拂袖喜滿容笑指霽日扶桑東其篇法頗與
友諒相近然不若朱之朗朗也思先官至福建
布政而溫州
府志失載

葉谷亮

一首

字里未詳詩見沈巽明詩選

邢溝懷古

丞相三軍出曾聞此散亡黃蘆今夜月白骨舊時霜世
已尊王室人猶說戰場維舟重感慨涕淚在衣裳

胡溫 一首


溫字遵道會稽人

詩話溫異人也少落魄湖海間後入閩性好飲
不常得人方置酒不問主客逕造飲酒盡不謝
而去日出行市中羣小兒逐之呼曰風子溫顧
而目笑夜宿古祠下雖寒冬雪甚衣布單衣履
草屨身不顫慄人或遺以衣不至數步遇寒者
輒解予之駙馬都尉王恭守閩孝陵賜以織金
衣衣僉具酒賀溫笑入曰某亦賀公持酒覆其
衣恭不為忤溫亦自若漳帥徐玉好士溫特過
其家玉召飲同官俄而溫至歌詩起舞至慢罵
生客玉亦不厭也過元漳州守迷理述世祠醉
之水祭以文曰衆之生不如侯之死侯之死名
長在此萬歲千秋元之臣子拜已大笑而出著

書名曰竹帛流芳載元忠臣義士并貞烈女叙其本末系之以辭類鏡歌輕重皆有深意一日告徐玉曰吾將歸矣負索行三舍為關卒阻而回發索中止有硯一易酒飲之起舞作喜鵲之歌歌畢仰户而死時洪武七年冬也玉葬之漳州西門外天台林公輔為作胡風子傳其大畧如是公輔稱其生死如在已蓋冷謙張選選周顛仙一流

歌

閩山喜鵲少越山喜鵲多如何不歸去其奈羅網何



明詩綜卷十七